

# O LE SULU SAMOA



EKALESIA FAAPOTOPOTOGA KERISIANO SAMOA  
O LE NUSIPEPA FAA-LE-LOTU NA FAAVAEINA I LE T.A. 1839



FAAVAEINA 1839      O LE SULU SAMOA      MATI 2022

email: sulusamoa@cccs.org.ws - Main Office: Ph. 24414, Ext 30 - website: www.cccs.org.ws

MAPU MAI LE GALUEGA, MAPU I AAO O LE ALII.



LUPELINE FEATA TAGALOA

AVEA VAGANĀ TALITONU FS

TA'ITA'I & AU MAUTOFI O LE SAUNIGA TATALAINA

MAFUTAGA FAAFOUINA TINA EFKS 2022



Merita S. Tauati  
Ta'ita'i, TP & Lauga



Tausunū K. Leifi  
Tatalo Faafetai



Vaita'i I.V. Samoa  
Tatalo Faaoesega



Perive F. Sa'ena  
Tatalo Mana'oga

# FAASINO UPU

1. O LE LAUGA	2
2. TAEAO FOU EFKS I NIU SILA	4
3. MAI LE TUSI FAITAU ASO O MATI	5
4. O LE PEROFETA MULIMULI	9
5. NA O AFIOGA E TULEI MAI	12
6. O E UA FAI I LAGI FOLAUGA	13
7. ATA O E UA MALILIU	16

## O LE LAUGA

Tusi Faitau: I Nofoaiga Tupu 20: 4-8; 21: 1-30

Matua: 1 Nofoaiga Tupu 21: 8. “*Ona fai atu lea o Tavita i le Atua, ua ou agasala tele, ina ua ou faia lenei mea; a o lenei, ou te aioi atu ia te oe, ia faamagaloina le agasala a lau auauna, auā ua ou faavalea lava.*”

Manatua Autū: A ‘ela le matega a Ta’ita’i, ona malaia lea o le nuu; a e Alofa mutimutivale pea le Atua.

E i ai le talitonuga lautele a ē ua leva ona mata’itūina faiga o limata’ita’iina ai le lalolagi, i mea ogaoga o tutupu ai i lenei vaitau, e faapea: O lea ua savalia nei le piliota e sefulu tausaga, mai le 2020 e oo atu i le 2030, e matuā ogaoga mea ua tutupu, ma o le a tutupu ai. O le faata’ita’iga, o lea na amata le piliota lenei i le faama’i, sosoo mai ai ma le taua a Rusia ma Ukraine, a e o loo fa’aaauau le tele o isi taua o sauāina ai isi atunu o le lalolagi, tatou te lē o faalogo i ai. O lenei manatu e lē o se manatu fai vavale (*conspiracy theory*), a e faavae i mea ua leva ona fuafuaina, o mea ua uma ona tutupu, o loo faamauina i faasalalauga ma tusitusiga ua āu tausagā o fuafua.

O lenei foi manatu o faailoa ai, o tagata o umia, ma ua leva ona latou umia le tamaoaiga o le lalolagi, o i latou lava ia sa fuafuaina ma o loo taulamua i ia faiga lē mafaufau ma le lē alofa. O le tele o mea leaga ma le faa-tiapolō e pei o le mativa, o taua, o tagata sulufa’i, o faama’i ma le tele o isi mea tīgā ua olopalaina tagata o le lalolagi, o mea na fafau e tagata ma faalapotopotoga faapea, ma ua aafia uma ai atunu ma tagata nuu uma o le lalolagi. O i latou foi nei, e pulea le **tala ‘ave e ala i faasalalauga i nusipepa**, o televise ma aga fesoota’i faaneionapo (social media).

A e afai e pule i le tala ‘ave, ua pule foi i le faamatalaina o le mea moni (*defining truth*), le mea sa’o, le mea e lelei mo tatou. Lona uiga, ua pule foi i

le mafaufau o le tagata, auā poo le ā lava le tala e aumai, ua tatou talitonu foi o le mea moni lenā, le mea lelei lenā, le mea sili lenā, o le mea faaleatua lenā, tusa lava poo se tala e matuiā lona sesē, po o sona taunuuga leaga ma le ogaoga.

O le faata’ita’iga, o le taua o fai nei a Rusia ma Ukraine. E ese mamao le mea ua faasalalauga mai ma ua talitonu i ai le lalolagi, ese le mea na tupu, ua afua ai le taua. Ina ua faataape (*dissolve*) le atunu o Soviet Union (Rusia tuai) ina ua uma le taua malulū (*Cold War*) i le va o Amerika ma le Soviet Union (Dec. 26, 1991), na sainia ai loa e Amerika ma Rusia le feagaiga, e le aiāina e Rusia malo uma o le a ò ese mai ia Rusia (e.g Ukraine), e le aiā atu foi Amerika ma le NATO (*North Atlantic Treaty Organization*) ia Rusia ma ona atunu tuaoi. O le tausaga 2014, na osofa’ia ai ma aveese faamalosi le faigamalo sa i ai a Ukraine, ae tuu i ai se malo fou, e matele i le faa-Komenisi. O lea faiga na fai e le NATO ma Amerika, ma o iina na afua mai ai le faafitali ua tula’i mai nei.

Manatua le osofa’iga a Amerika i Iraq ma fasiotia ai lona ta’ita’i o Saddam Hussein, ona o tuua’iga faapea o ia gaosia ma faaputuina meatau mata’utia (Biological Weapon); e le’i maua ni ia meatau i Iraq, a e o se tuuaiga pepelo ona e i ai le mafuaaga (o le a le auiliiliina). Na saini lima uma le lalolagi, e matuā tapu ona faia e se atunu ia meatau mata’utia.

O le osofa’iga a Rusia i Ukraine o faia nei, ina ua iloa e Rusia, o loo faia e Amerika ma le NATO ia meatau i lo la tuaoi ma Ukraine, ma e matuā lamatia ai le saogalemū o lona atunu ma ona tagata. O le taimi nei, o teena malosi e Amerika ia tuuaiga, a ua latou faasalalaugā le tala sesē, masalo e ono fa’aaogā e Rusia ni meatau faapea. O se taumafaiga e tau taofiofi ai le ita o le lalolagi i lona taufaasesē ma le soli tulafono. E matuā tele faasalalauga faapea e faia i aso uma, a o loo ta’ita’iina ai pea i tatou i le tala ‘ave sesē a le tiapolō.

Ua i ai Samoa i luga o le gaga, ina ua taunu mai le faama’i Koviti-19 i o tatou laufanua. Ona o tagata lava e pulea le tamaoaiga, o faasalalauga, e pulea foi le tala ‘ave ma le **mea moni**; o i latou foi ia na gaosia le faama’i, ma gaosia foi vailaau ua soo ai nei le lalolagi.

E tele foma’i atamamai e fitoitonu i ai le ituiga atamai faa-foma’i lea i vailaau, sa latou fautua ma tuualalo mai, e ‘aua nei talia nei vailaau, ona o loo afifi mai ai le faama’i. O la latou tala, E moni ua pipisi le faama’i na faama’ite e le tiapolō, ae sili atu ona ogaoga mafatiaga faaumiumi, pe afai e tuuina nei vailaau

matautia i o tatou tino. Peita'i, ua lē lagona o latou leo, ona e puleesea ala o faasalalauga, ma o tatou mafaufau (tulou). Ua ā nei? O lea lava ua taunu la latou faasoa mai.

O lea ua silia i le afe (1000) tagata ua pesia i le faama'i i Samoa. O fea foi tui na tatou taufetuli nei e fai faimai e puipua mai ai i le faama'i? Ae aiseā ua toe pisia ai pe afai o puipuia? O lea foi o toaaga pea le Malo ma le Soifua Maloloina e tauanau tagata e o atu e fai le isi tui o loo folifoli mai tua. O silafia ea le talafaa solopito o faama'i ma tuiga na fai e tagata lava nei, na matuā ogaoga lo latou taunuuga?

E pei o le **fefe** o le ta'ita'i o Israuelu, le tupu o Tavita, i le tala ua aumai e uiga i sau'ai, ma 'ela ai le matega i lana ta'ita'iga, ua faapea foi ona lē mapu le tala'ave o faasalalauga i le faafefeina o le lalolagi i le sau'ai e igoa ia Covid-19, ma naunau ai e faia tui ma tuuina vailaau matautia ma le faama'i i ū tatou tino, ae meamanū e le'i oo mai se faama'i. O le sau'ai moni, e lē o le faama'i, a o le tui.

O le tala a le Tusi Paia i le ta'ita'i logologoā o Tavita, ina ua pale mai i le nofoalii o Israuelu, o ia lea na filifilia e le Atua atoa ma Israuelu uma, na te ta'ita'i le nuu. O ia na faatoilaloina fili o le nuu, a o tau faatū le malo i Jerusalema. Tele taua na fai mo lea faamoemoe. O le isi taua na tau ai ma tagata maualuluga e igoa o fanau a Rafa poo sa Rafā (1Nofoaiga Tupu 20: 4, 6); o le faaperetania, o sauai (*giants*). Ai ua mata'u Tavita i sau'ai e ta'i ono tama'ima'ilima ma tama'ima'ivae, na afua ai ona ia faatonu Ioapo e faitau le nuu, ona aumai lea o le faitau aofai ia te ia. O le mafuaaga lea o le to'atama'i o le Atua (1 Tupu 21:1). Sa fautua Ioapo i le tupu, peita'i na usitai lava, e faigatā ua malele le tupu.

Fai mai le Tusi Paia, "*Ua leaga lenei mea i le Atua; ona fasia ai lea e ia o Israuelu*" (1Nofoaiga Tupu 21: 7). Aiseā? O lea na tau nei le tele o taua ma manumalo ai i le faamoemoe i le Atua, a lea na puaina mai loa le tala taufaamata'u i sau'ai, tope loa le faitauina o le nuu, tagata e i ai pelu, foliga o lea ua faamoemoe i tagata, ia mautinoa ua lava tagata e tauina le taua, a o fea le Atua? Fatalai le Atua ia Kato le tagata vaai, alu e fai ia Tavita, **O mea e tolu** ou te tuuina atu ai ia te oe, ia filifili ia oe i se mea e tasi o ia mea ina ia ou faia ia te oe. Filifili ai oe:

1.Poo se oge e 3 ona tausaga. 2.Poo masina e tolu e faaumatia ai oe i luma o e ita mai, ma oo atu ai ia te oe le pelu a ē o fai oe ma o latou fili. 3.O le faama'i i le nuu, ma le agelu a le Alii e faauma ai i nuu uma o Israuelu.

Fai mai le tala, Ona tuu mai lea e le Alii o le faama'i i Israuelu, ua oti ai tagata o Israuelu e 7,000. E lē gata i lea, ua auina mai le agelu e faaumatia Jerusalema. Peita'i o le Atua, e i ai pea Lona alofa tunoa, e ui i Lona to'asa.

Fai mai ua tele le fasi a le agelu ona Ia (Atua) salamō ai lea ona o le malaia ma fatalai atu i le agelu: "**Ina soia! Taofi ia lou lima,**" ona tu lea o le agelu. Ona fai atu lea o Tavita i le Atua, ua ou agasala tele, ina ua ou faia lenei mea; a o lenei, ou te aioi atu ia te oe, ia faamagaloina le agasala a lau auauna, auā ua ou **faavalea** lava. Ai ua toe gaualofa le tupu ona o ia o le ta'ita'i, na mafua ai ona oti le nuu. E ā ulu tafega ae selefutia ai Vaisigano.

Ua tātā tetele le faama'i i Samoa, a o le talitonuga lautele o foma'i e fitoi tonu i ai le atamai i vailaau, e lē o le fili le faama'i, a o le fili le vailaau. Sa taumafai mai lava foma'i alolofa moni e logo pualii le lalolagi, a ua gotouga o latou leo ina ua faalologo le lalolagi ma ona ta'ita'i i le tala'ole a le fili. Fai mai foi o tui e puipua ai mai le faama'i, a o lea ua toe pesia le toatele ua maea o latou tui. Fea le puipuiga o loo latou laugaina? O lea foi ua toe faasalalau mai le toe taunu mai o isi foi tui. Ae matautia faamaumauga i le oti o le faitau afe o tagata ma nai fanau i le lalolagi, na faata'ita'i i ai lenei mala, i le tele foi o faama'i ma vailaau na fai (*engineered viruses, diseases and vaccines*) i aso ua mavae, o pulea e tagata fai pisinisi ae lē o fomai. E lelei le tupu o Tavita, e ui ina sa lē faalogo i se tuualalo a lana ta'ita'i 'au o Ioapo, ae na vave ona salamō ma ta'utino lona **faavalea**, ma toe faatoese ma osi taulaga i le Atua, ona ola lea o le nuu. A o tatou, o loo ifo peia i pulega faatemoni o le lalolagi, ma tatou talia ma le pogisa nei vailaau. E toe fia ni vailaau ona faamalieina lea o le faama'i?

Ua lē masino le tele o fesili ua tula'i mai e pei o lenei: Aiseā ua toe gasegase ai ē ua maea o latou tui? Aiseā ua mana'omia ai le sili atu i le 3 tui? Aiseā ua talia faigofie ai nei vailaau e aunoa ma lo tatou lē silafia o le tala'aga o mea ogaoga ma le oti o le faitau afe o tagata i le lalolagi, na tutupu muamua e mafua i vailaau faapea i isi foi faama'i e tele ua mavae?

E lē fia tau le pua ma lafo se tuua'iga i se tasi, peita'i o la Iesu: *e i ai ona po "latou [te] tuuina ai ...outou i le puapuaga, ma latou fasioti outou ... e tausuai ai tagata e toatele, e faalata le tasi i le tasi, ma feitagai i latou. E tutū mai foi perofeta pepelo, latou te faasese foi i tagata e toatele. E maalili foi le alofa o le toatele o tagata, ona ua tupu tele le amio leaga"* (Mataio 24: 9-12).

O tatou uma o ta'ita'i, i o tatou aiga, i o tatou nuu, i le Ekalesia ma le Malo, e mapuitiga i ai e o faalagolago ma faatuatuaaina mai la tatou ta'ita'iga ma se auaunaga. Ae a tatou **Iē fesili i le Atua** a e fai lava o tatou loto, ma faitau le aofa'i po se tele o so tatou iloa poo se manuia, ma se puipuiga i se faitau i numera faaletagata, ona ā ulu lea o tafega, a e selefutia ai Vaisigano, auā E Poto le Tautai, a e sesē lana atu i āma.

A 'ela le matega a Ta'ita'i, ona malaia lea o le nuu; a e Alofa mutimutivale pe a le Atua. Amene.

*Saunia susuga Dr. Tavita Maliko FS, EFKS Lepa, Matagaluega LOTOFAGA LEPA ALEIPATA.*

## **TAEAO FOU O LE EFKS I NIU SILA - TATALA LE A'OGA TUSI PAIA MALUA**

Ua faamauina le Aso 26 Fepuari 2022 i le Tala Faasolopito o le EFKS, a e maise i le galuega a le EFKS i Niu Sila, o le aso lea na amata aloaia ai le polokalame o le Aoga Tusi Paia a Malua i Aotearoa. O le sauniga lotu e tatala ai lenei polokalame sa faia i le malumalu o le EFKS Pakuranga, na ta'ita'iina ma fai le Lauga e le susuga Vaaelua Patu FT; o le susuga Faatulituli Setu FT na faitauina le Tusi Paia, o Pouniu Faamausili FT na saunia Tatalo. O Pese ma Viiga o le Atua na lagiina lava e i latou sa auai i lea sauniga matagofie. Na auai ma molimau le aufaigaluega i Toeaina, Faafeagaiga ma Faletua, o nisi o Matua Pesinione pei o Tautiaga Senara FT ma Professor Otele Perelini FT, faapea sui o Aulotu i totonu o Niu Sila. Sa mafai ona auai atu ai, e ala i ala-ata o le ZOOM, le Pule ma Faia'oga Kolisi Faafaifeau Malua mai le laumua i Maluapapa, o le Failautusi Aoao susuga Vavatau Taufao FS fai ma sui o le Laulau Fono Tele ma le afioga i le Taitaifono Komiti o Malua, susuga Asotasi Gu Time FT, sa auai mai le Ofisa Tutotonu o le Ekalesia i Tamaligi. O le afioga i le Taitaifono Komiti Malua sa saunoa i le saunoaga autu, e saga faaopoopo le viiga o le Atua, e faafetaia le komiti filifilia, e momoli faamanuiaga a le Komiti a Tama ma le Ekalesia Aoao, ma tatala aloaia ai le A'oga Tusi Paia i Aotearoa.

O le susuga Eperoni Futi FS sa fai ma fofoga o lea aso taua, a o le susuga Talia Tapaleao FS le Taitaifono o le Komiti Galue Aoga Tusi Paia i Niu Sila, na saunoa i le tala ototo o le amataga mai o le galuega o le Tala Lelei a le EFKS i Niu Sila, ma laasaga uma ua afua ai lenei taeao fou o le galuega i Niu Sila. O le tausaga 1962 le ulua'i taeao, na faatuina ai le ulua'i Aulotu i Niu Sila. O le 60 tausaga mulimuli ane, lea ua toe faatuina ai le taeao lona lua e pei ona

i ai lenei aso. O le 2008 na amata ai le Aoga Tusi Paia i Samoa, a o le tausaga 2010 na ave ai le Mau a le Matagaluega Manukau i le Fono Tele, ina ia fai foi se Lala o lea Aoga Tusi Paia i Niu Sila. O le tali o lenei mau na amata mai ai le faasologa o fonotaga, feutana'iga ma saililiga i le tele o itu talafeagai, seja aulia le tausaga 2020 na tofia ai loa le komiti faapitoa e silasila ia faamautu, faataunu ma faatino loa lenei miti.

O le Komiti filifilia e aofia ai susuga Toeaina ia Vaaelua Patu FT, Pouniu Faamausili KMTA Aukilani, Talia Tapaleao FS (Taitaifono), Dr Peniamina Leota FS, Dr Featunai Liuaana FS, Eperone Futi FS, Sesera Tolovaa FS, Victor Pouesi FS ma Iosefa Tiata FS. O i latou uma foi nei ua ofoina mai la latou auaunaga faa-faiaoga mo le Aoga Tusi Paia, faatasi ai ma susuga Maafala Lima FS, Filemoni Crawley FS, Imoa Maua Setefano FS, Tafesilafai Lavasii FS, Penitala Kolose AM, faapea le susuga i le Faifeau Toeaina Penisione ia Tautiaga Senara FT. Ua ofoina le auaunaga e galulue fua aunoa ma ni totogi i latou nei; e faapea foi i latou ua resitara o latou suafa mo le a'oga, e leai se tau o le resitara. E oo mai i le taimi o le sauniga, ua 32 i latou ua resitara, a e i ai le talitonuga e toatele nisi o le a faaopoopo i le aga'i i luma.

Na maua le avanoa e saunoa faafetai ai le susuga i le Faifeau Pule o Malua Dr. Vaitusi, faapea le susuga Faatulituli Setu FT, KMTA Matagaluega Laumua o Aotearoa, a e maise le mamalu o le Ekalesia, na avea ai le tiakono ia Lavea ma failauga. Na taualuga le aso i le saunoaga faafetai ma faamanua a le Toeaina susuga Pouniu Faamausili FT.

# MAILE TUSI FAITAU ASO O MATI

## ASO SA, 6 MATI 2022

Tusi Faitau: Feagaiga Tusi – Esoto 3: 7 – 10.  
Feagaiga Fou – Luka 9: 37 – 50 (Tusi Faitau Aso)  
Matua: Luka 9: 37 & 42, “<sup>37</sup>O le taeao, ua latou o ifo ai i le mauga, ona fetaia’i lea ma ia o le motu o tagata e toatele... <sup>42</sup>O loo sau ia, a e lafotū ma faatafiti ia te ia e le temoni. Ona vavao lea e Iesu i le agaga leaga, ma ua faamalolo i le tama, ma toe tuu atu ia te ia i lona tamā.”

## MANATUA OAO VAIASO: OLE TALALELEI ALUKA(2) IFOA’I MAILE MAUGA MANATU AUTŪ ASO SA: OLE ATUA E AFIO IFO

A o vevesi le taua o fai nei, i le va o malo Rusia ma Ukraine, o loo logologoā ai tala o le Piseretene o Ukraine, le ta’ita’i o Volodymyr Zelensky. O Zelensky o se Iutaia, pei foi o lo latou Palestina. Sa manatu tagata ai nei a sosola o ia ma lona aiga, e sulufa’i i se isi atunuu, e pei o le masani a isi peresetene muamua. Na ofo atu foi e Amerika le auala e faasola ese ai, ma le nofoaga e ave i ai, auā o ia lava le tagata numera tasi o loo sailia e Rusia.

Peitai ua faate’ia le lalolagi ae maise o tagata Ukraine lava ia, ina ua folafola e le peresetene, e nofo faatasi o ia ma ona tagata, i o latou fanua ma eelele, e puipui lo latou saogalemu, lavea’i le saolotoga, e tau mo ona tagata nuu. Ua la’ei foi ona ‘ofu tau, ma auupega. O le filifiliua faia e lenei ta’ita’i, o se faatofalaiga e sili ona mamao, o se faautaga e sili ona loloto, faavae i le alofa moni i ona tagata. Le alofa e lē sola ese, e lē ‘alo pe lafi; le alofa foi e lē faamāepaepa i ona mamalu ma ona paia maualuluga, a e ua alu ifo, i le mea o i ai ona tagatanuu, e faatino le lavea’i ma faaola. Afai o lea o lenei Peresetene o se Iutaia, e lē taumate, lona talitonu i le Atua ma Lona alofa, na te silafia manino foi le tala faasolopito o lona nuu, amata mai le faasa’olotoina mai Aikupito.

O le faamatalaina e Mose o le esoto, o loo manino ai le Atua ua afio ifo i lalo. Ua afio ifo ma fa’ali aane ia Mose i luga o le mauga o Horepa, i totonus o le laau talatala e mu ae lē faaumatia. Ua la’ua fesaga’i ona fetalai lea o Ia, “Ua ou vaai atu, ua ou faalogo atu, i le puapuagatia o lo’u nuu o loo i Aikupito. O lenei, ou te alu ifo, ou te lavea’i mai ia te i latou.”

Ina ua fetalai le Atua o le a alu ifo, o lona uiga, o le Atua e tu’ua Lona afioaga paia, tuua ona sā ma faigā, ona mamalu ma paia silisili ese, a e afio ifo i le mea o i ai le tagata, o i ai Lona nuu, o feagai ma puapuagā, ina ia lavea’i i latou. E ui ina tū ‘ese, e mamao, ma maualuga Lona afio’aga, a e o le Atua e afio i mea uma, na te silafia foi mea uma. Na te silafia manino mai, soo se mea e tupu i lalo nei, a e maise i puapuaga o Lana fanau faatuatua. E lē gata i puapuaga, a e faapea foi i lau tautua ma lau auauanaga, o tulaga uma e vaaia ai le tigaina, ma lagonaina ai le mafatia.

Ona o lenei masina o Mati e feagai ai le Ekalesia ma le Faamati, e ala ai ona muamua fia ta’ua, ua talafeagai le mataupu o le ulua’i Aso Sa o Mati – o le Atua na fai i ai la outou Faamati, o le Atua ua afio ifo - i le mea o fai ai lau tautua. Na te faamanuia mai. Na te silafia manino gaioiga uma, e lagona i’uleo uma, mai le loto i totonus se’ia oo i faatinoga. Malo le Faamati. E faapea i soo se taimi. E lē lilo lou afu sisina, lau molimau ma lau tautua mo Ia. E lē lilo lou ōi tauiv i sailiga malo, e lē puaoa i ona fofoga lau sailiga fofō ma togafitiga; o ou loimata maligi, lou tigā masūsū, le fetō’i o lau mānava, ona o fesagaiga ma puapuaga eseese o le olaga nei. O sauāga faa-Aikupito, pei ona sa feagai ma Israelu. *Ou te alu ifo, e lavea’i i latou.*

E faapefea ona faatino le galuega lavea’i? E ala ia te oe Mose. *Sau ia, ou te auina atu oe ia Farao, ina ia au mai lo’u nuu.* O le valaau a le Atua ia Mose, la te o ifo faatasi ma Ia, e fai faatasi le faaolataga mo le nuu. Ia fai e pei ona amata mea le Atua, e alu ifo i lalo – Mose, sau i lalo. Ia tuu loa lana mea o fai, e ui ina tāua ma aogā i lona aiga, ae tuu pea. Tuu lou loto ma lou mana’o, a e fai loa le mea ua fetalai mai ai le Atua; ave i ai lau faamuamua, tuu i ai lau faamamafa.

Sa le’i faigofie ia Mose. O ai a’u nei? A o ai lou suafa? Faapefea le pulega mamalu a alii ma faipule o faatali mai? Ma le isi, o a’u e lē talenia, e lē agavaa, e lē iloa fai se lauga. Ma isi mau faanoai, o faafitifiti i luga o le mauga, ia ‘aua ai ne’i avanoa, ‘aua ne’i tigaina pe maumau ai taimi, ‘aua le sau i lalo, ne’i faa’ele’elea pe ma’osi’osia. E faatupula’ia le aofa’i o Farao pule sau, e faateleina Aikupito faa-pologa, ma auala o sauaga. Ma e manaomia ai pea e le Atua, ni Mose na te fa’aaogā, e faia Lana galuega lavea’i i soo se auga tupulaga.

---

E tulaga ese le maitauina o le Atua, Lona lē tausisi i Sana pule pule tutū, pule fai faamalosi, poo Lona toasā. Ua lē finagalo ia toso a' e Mose i le maualuga o i ai, a o Ia ua faamalo' ulo'u ifo, ma feutaga'i i le tulaga o i ai le vaivai o le tagata. Ua la'ua soalaupule, fetuutuuna'i muniao, i le tulaga e talia gofie ma malamalamai ai le tagata. Ua faailoa e le Atua lona suafa O A'U O LĒ OLA, ua faamalosi ma faalototele, ou te i ai faatasi ma oe. Ua malamalamai foi le auauna, ua tupu le faatuatua, ua mafanafana ma sauni fiafia e fai le galuega, ina ua iloa o lona Atua e alofa faamaoni i lona nuu, ua matuā afio ifo.

Mulimuli ane, ua sa'oloto Isaraelu, ona la'ua toe fesaga'i foi lea i luga o Sinai, ma alu ifo ai Mose i lalo ma papa ma'a o le tulafono. O le faailoga o le finagalo o le Atua, ia o faatasi ma lona nuu. Pe liu efuefu papa maa, a e lē toe aveesea tulafono, ua tusia i loto ma papa aano, e tuu faasolo i auga tupulaga e faavavau. O tulafono e lavea'iina ai mai le leaga, e faatonu folau ai le folauga ia manuia ma saogalemu.

*Ou te alu ifo*, o se tasi o afioga faa-valoaga a le Atua, e faasinio i Lona liutino tagata, pe a oo i ona aso e tatau ai. O aso e lē toe valaauna ai Mose, poo se tasi perofeta, a o Ia lava, e ala i le Mesia, Lona Alo o Iesu. O le Atua e afio ifo.

Ile Liliueseina o Iesu i luga o le mauga, sa manana'o Peteru Iakopo ma Ioane, e fau ni fale apitaga se tolu, e nonofo ai pea ma Iesu, i le mālū, matagofie, filemu o luga o le mauga. A e lē o le finagalo lea o Iesu, e lē o luga, le nofoaga na Ia afio mai ai. O le taeao, ua latou o ifo ai i le mauga. O le laugatasi, i le mea o faatali atu ai le motu o tagata, e faafetaia'i e le toatele – e tofu le tagata, tofu le aiga, ma le avega o tau'ave. O to'atuga i tino, mafaufau ma loto, o ma'i, o faalavelave, faafitauli, mea o faapologa ai e mana'oga eseese.

E pei o le tasi aiga, si tamā ma lona atalii pele e toatasi, ua saisai e le tiapolo, ua maua i le ma'i aitu, faataitaiō ma faatalulauā, faataafiti solo, tafe le fāua i lona gutu, tu'i fulifuli, toe ina a oti. Talofa e, i le vaai atu i fanau pele, o tafili saunoa ai le tiapolo. Toe faaopoopo atu ma le mamafa o tiga, o le na ona to'atele o foma'i, a e lē mafai ona latou togafiti. Fai mai le tamā ia Iesu, "Na ou aioi atu foi i ou soo ia latou tuli ia te ia i fafo; a ua latou lē mafai."

E i ai le manatu e lē o se itiiti o le faatuatua, na lē mafai ai. Auā i le amataga o le mataupu lenei e 9, o loo tuu atu ai e Iesu i ona soo, le mana ma le pule i temoni, ia faamalolo i ma'i. Na latou o atu, faatino, toe foi mai ua manuia le misiona.

A e o lona uiga, e i ai nisi mafuaaga na faiaina ai. O mafuaaga faa-mea-maualuluga, ma amio faasausili a e pi'opi'o lea foi tatou te vaivai ai tatou. E pei o le lē alofa, e manatu faapito; e faailoga lanu, faailoga tagata, e lē tau i ai. E vaai maulalo i sia aiga, e mativa, e leai se mea e maua mai ai. O le auaunaga, e fua ma faalagolago i le taui. Pe mumusu foi ona o le loto vale – tuu pea se'i sau le Faifeau, poo ana tama la na alu ma ave i luga o le mauga. Ua fai vaega. E lē faamaoni. Leai se ta'ita'i, leai se fia galue. Se'iloga e vaai mai tagata. E lē fia tautua matalilo, a e tautua fa'alialia. Ma nisi vaivaiga e faaluafesasi ma toilalo ai auaunaga, ua valaauna ai.

Lea foi na fetalai le Alii, o le a tuuina atu le Atalii o le tagata, e puapuagatia ma maliu. A e ua lilo, e matuā lē lagona pe se ā lona uiga. Aisea? A lea fai mai Luka, Ua tupu le finauga, poo ai so latou e sili. Ua saili poo ai e aupito maualuga. O ai e sili lona tofi? O ai na muamua valaauna? O ai Muamai, a o ai Mulimai. O le tasi a'u e poto, o le isi a'u e lima malosi. Ma isi mau a'u, o temoni e ulufia ai le agaga, ma faiaina ai pea le misiona a le Ekalesia.

E le'i faapea le Alii, ua alu ifo nai le mauga. E lei punitia lana vaai ma lana faalogo atu, i le leo o le tagi ma le fia ola. O le ā le vāvāō, fetaomi ma tautulei o tagata ia Iesu i o latou mana'oga, a e na Ia lagona lelei, le tulaga ese o le faaooololoma'au ma faatoga mamate a le tamā; e tau lē lagona le leo, a o lona loto e tumu i le faatuatua, ua sasa'a atoa atu, e sau ma le talitonu atoatoa ia Iesu. Na sau ma le alofa moni, e lē mo ia, ae mo le atalii. Le alofa moni e sau ma aumai uma – o le atalii, le temoni, ma le matagā i le vaai a tagata. E le'i mā le alofa moni.

E lē lagona mai i tatou e Iesu, pe a tatou teuteu lumāfale i luma o tagata, musu ne'i tauemua ma faitioina. Ae ia tatou o atu, faailoa o le ā le matagā i faiga a le agasala. *"O loo sau ia, a e lafotū ma faatafiti ia te ia e le temoni. Ona vavao lea e Iesu i le agaga leaga, ma ua faamalolo i le tama, ma toe tuu atu ia te ia i lona tamā."*

Fai mai le ōi a Iesu, i Lona faanoanoa i ona soo, Ou te i ai ia te outou, ma onosai ia te outou seia afea? Tou te lē faatuatua ma faapi'opi'o, seia afea? A o le faaleoina foi lea o Lona matuitui, le tiga alofa i le

vaai atu i aafiaga o le agasala, o faapologa ai le lalolagi, e pei o lea tamā ma lona atalii! E pologa se’ia afea? E lafotū ma faataafiti seja afea?

Ua tatou i ai i se vaitau o le tele o mafatiaga eseese-o taua ma sauaga, o suiga loulouā mata’utia o le tau, a e maise le Faama’i mata’utia o le Koviti19, ma ona fesuiaiga pei o le Delta ma Omicron. Tatou te fesaga’i ma nei avega, seja afea? Ua a’afia ai ma fuafuaga a le Eklesia, i tapua’iga i le Atua ma ana polokalame faasolo. O atina’e ma fonotaga a faiga malo, o totonu o tatou aiga, o a’oga ma galuega. E lē uma tiga ma mafatiaga. Auā e lē uma le agasala. E lē moe le fili, seja afea. E lē uma foi le tigaina i avega. Auā e lē uma le ola tautua mo Keriso. E faia pea, seja afea.

Ua faamanatu mai le Tala Lelei, e ala i le Tusi Faitau Aso, i le alofa faamaoni o lo tatou Atua, ua afio ifo i le mea o tatou faata’otolia ai, ina ia faamalolo, lavea’i ma faaola. I le mea o tatou auauna ma galulue ai, e tausoa la tatou avega, ina ia māmā, ia gafatia. *Ia outou o mai ia te a’u, outou uma e tigaina ma mafatia i avega, o a’u e malolo ai outou.*

A o vagaia foi le La’o’ai Paia i le ulua’i Aso Sa o le masina, o laulauina ai le Areto ma le Uaina, o faatusa o Lona tino momomo ma Lona toto paia, na maligi mai i luga o le Satauro. O le Atua ua afio ifo, na maliu, na tanumia, na oo ifo i Seoli, ina ia si’i a’e le tagata agasala, ma avatu i le ola e faavavau. Ia tumau ia te Ia le viiga, nei e oo i le faavavau.

## **ASO GAFUA, 14 MATI 2022**

Tusi Faitau: 2 Samuel 12: 18 – 23.

Matua: f. 20, “*Ona tula’i lea o Tavita nai le eleele, ua ta’ele, ma u’u, ma sui ona ofu; ona alu atu lea o ia i le fale o le Alii, ma ifo, i le sau ai i lona fale.*”

Manatu Ta’iala o le Vaiaso: FESAGA’I MA LE POULIULI - LĒ MAUTONU.

Manatu Autu o le Asō: OTI LE ATALII O TAVITA.

O le oti o le atalii o Tavita, o le lāgia lava lea o Siona, le maota o tupu, ma le nofoalii o afio ai alo o Iese. Ua lāgia foi Salema o le laumua o faautugatagi a le nofo ituaiga e 12, i le sau mai Tanu se’ia pa’ia Peresepa, na tatanu ai vai’eli o le matua ia Aperaamo, Isaako ma Iakopo.

O le gagana masani lea a si o tatou atunuu, e faalupe ma faalagi ai, faanoanoaga ma tiga matuitui, pe a fesaga’i ma le pouliuli o le oti. O le gagana e faamaise ma tau faamatafi ai le ao pogisa, ma faamafanafana ai loto faanoanoa. E lē gata foi i le oti o le tulu’iga o tiga, a e faapea foi i soo se ituaiga puapuagā, sauaga, pulega, aafiaga o faai’uga e fai e isi tagata. E lagona le lē mautonu, e tau faafesoota’i le talitonuga i le Atua ma mea e tutupu, ma e oo lava ina fesiligia, le moni o le i ai o le Atua. O ituaso e nunumi, gaogao ma pogisā faasoloatoa ai o tatou lalolagi, pei ona sa i ai le foafoaga i le amataga. Ui i lea, e pei ona sa fegaoioia’i le Agaga o le Atua e faasagatonu, faatulaga lelei ma faamalamalama mea uma, e faapea foi ona oo mai nei lava, o galue alofa o Ia mo le tagata faatuatua pe a uftia i le pogisa.

O le oti o le atalii lenei o Tavita, ua maitauina ai suiga tetetele i le tupu. O suiga mate gatā. A o ma’i le tama, sa tatalo ma anapogi, e le’i ‘ai, ua ao le po o taoto i le eleele. A o le taimi na maua ai le tala, ua maliu le atalii, o le taimi foi lena na uma ai le tiga, ua te’ā le matuitui ma le faanoanoa. Na fesiligia pe se a le uiga o lenei aga? Fai mai Tavita, *sa ou fia iloa pe alofa mai le Atua ia te a’u.* Lea ua tali le Atua, ua oti le atalii, ua iloa ai e Tavita, le alofa faamaoni o le Atua ia te ia. E ui ina talia gatā, a ua usita’i ma talitonu i fa’aliga o le alofa o le Atua.

*Ua tula’i nai le eleele, ua ta’ele, ua u’u, ua sui ona ofu.* O le gagana e faailoa ai suiga fou. Mai talitonuga tuai, i laasaga fou ua ausia; mai le eleelea, i le faamamāina; mai le pogisa, nunumi ma gaogao, i le malamalamā, filemu ma olioli. O upu e faailoa ai le malie atoatoa o lona loto, i le tali mai a le Atua; ua suia lona iloa sa pu mo’omo’o, a o lea ua lautele, faasino i le Atua ma Lona alofa. O a ia uiga o le alofa o le Atua?

E amata mai i ona faaososoga ma le faatinoga o lana agasala mata’utia na fai. O lona latalata i le Atua, na aupito lalata, suamalie ma lololo ai faatosina a le tiapolo e faasesē ma faatoilalo. E ao ai ina mataala le tagata ua filifilia e le Atua i taimi uma e lē aunoa, auā o le taimi lava e manatu ai ua lelei, osofa’i loa le fili.

Sa manatu o ia e lilo, ai o lona tulaga mamalu mauluga, e soloia ai ana agasala; a e leai. E tutusa tagata uma i le Atua ma ana tulafono. E lē tu’ufaua e le Atua, auā e mamafa ia te Ia tiga o le tagata vaivai ua afaina, tagata ese pei o le Sa Hetī, faapea fanau

ma tina pei o Patisepa. O i latou na tuu atu, ia malu puipuia ma saogalemu i le pule a le tupu. E lē tu'ufaua foi e le Atua, auā e tāua ia te Ia lana auauna na filifilia; na te faatonu ma a'oa'i ia saga lelei atili, ia 'aua ne'i fai ma auupega a le tiapolo. Faasolo mai i lana faatoesega, lona faamaulalo ma lona salamō faamaoni. Ua na mautinoa lona faamagaloina; a e faataunu lava le taui ma le sala e tatau ai. E i ai tua o patatua.

O le alofa o le Atua e o faatasi ma Lana faamasinoga amiontu, mo le faataunuina o Lona finagalo paia ma Lana pule aoao. E galulue faatasi ia mea e lua, a e lē feāīā'i. E lē taofia le tasi, pe a faatino le isi. E lē avea foi le vā fealoaloa'i o tagata, ia Tavita ma le perofeta ia Natano, i faiā ma fesootaiga faaletagata, o masaniga, o tu ma agaifanua, e usiufi pe soloia ai le finagalo o le Atua. Ua iloa nei e Tavita le eseesege, ma le laina e gata ai faiā ma sootaga faalelalolagi, a e amata ai mea tau le malo o le Atua. E pei o Ioane le Papatiso, sa manatu o ia e fai faa-tausoga pe faa-Iutaia le papatisoga o Iesu, e fai i le āva fatafata, ma le fa'aaloalo. A e fai mai Iesu, *Leai Ioane, o le auala lena ua tele ina mama ai le galuega o le faaolataga*. “*Tuu mai nei pea ia; auā e tatau ia te i tatou ona faataunuina o mea tonu uma.*”

Sa manatu Tavita e lē fetau i le sātia o le ma'ave'ave lē fua, e ā ulu tafega, a e selefutia ai Vaisigano. Le otī o le pepe e mamā, e totogi ai le sala a le pagotā. Peita'i, e faia pea le pule faitalia a le Atua. Na otī le tama i le aso fitu, na otī e le'i faaigoaina, e le'i peritomeina foi. E lē o se tagatanuu aloaia o le nuu o Isaraelu, le nuu e pule ai le Atua; o Ia na te aumai, o Ia na te toe aveese, o Ia foi e toe suia mai.

E faigatā ona faafesoota'i. E tupu le lē mautonu, faaluafesasi ai le faatuatua. Peita'i a tatou talia le pule aoao a le Atua, ona faigofie lea ona tafia ese le pogisa, ma sagatonu le faatuatua, i le pule a le Atua na te faia le mea e sili ona lelei, nai lo so tatou mana'o. Fai mai le tupu, “*Oute alu ia te ia, a e lē foi mai o ia ia te au.*” Ua atagia mai lona talitonuga, o le pule a le Atua, e lē gata i le otī, e lē gata foi i le mea nei; ae i ai ona tua atu, la te toe feiloa'i ai ma lona atalii, i se aso o lumana'i.

E maualuga le agaga faafetai, fia vivii o Tavita i le Atua, auā e tele mea sa ia pogisā ma lē mautonu ai, a o lea ua manino i le alofa o le Atua. “*Ona alu atu lea o ia i le fale o le Alii, ma ifo, i le sau ai i lona fale.*”

Mata sa i ai se masaloga o Tavita, o lona tofiga tupu ma lana faiga malo, ua na o le ave'esea o Saulo mai le nofoalii ma le suia o le pulega tuai. Atonu sa manatu o ia, o le a pei foi lana nofoaiga o Saulo, e toe suia e se isi ona o lana agasala. Afai sa i ai ni ona masaloga faapea, ma fesiligia ai le fa'aauau o lana nofoaiga, o le oti o lona atalii lenei, ua faamautūina ai le tusi aao o le Atua ia te ia ma ona suli, e fa'aauau le ta'ita'iga o le malo.

Auā e i ai nisi tofiga a le Atua, e lē o le matua, a o le ui'i; e lē o le muamua, a o le lona lua. E pei ona amata mai ia Kaino ma Apelu, e matua Kaino a e na filifilia le taulaga a Apelu. E tele se sao o Tara i le malaga mai Uro, a e o lona atalii ia Aperaamo na filifilia. Na muamua fanau Isamaeli, a e mulimuli fanau Isaako na filifilia; e lē o Esau foi, le ulumatua o le masaga, a o Iakopo sa lona lua, o ia e fa'aauau. E oo foi i faiga malo, na muamua tofia Saulo o le filifiliga a tagata, a o le tupu lona lona ia Tavita ma le gafa tuufaasolo o lona aiga, na filifilia e ala mai ai le Mesia Faaola. E ui la ina ua oti le ulumatua lenei a Patisepa, a e tali i lagi se suli o lou malo, e toe fanau mai le tama lona lua ia Solomon, e fa'aauau le nofoa. O se tasi lea mataupu silisili a Paulo i ana Tusi ia Roma ma Korinito, o loo faalupe ai Iesu, o le Atamu lona lua, “*Auā e faapei ona oti uma ia Atamu, e faapea foi ona faaolaina uma ia Keriso*” E faaolaina ina ua faatuatua i le maliu i le satauro o le Alo o Tavita, Le maliu mai i le suafa o le Alii. O Lona toetu manumalo, ua na liliu ai ituaso pogisa, e fai ma taeao o le olioli. E ao ai ona tatou tau fai vivii faatasi ma Tavita,”<sup>5</sup> *Auā o lona toasā ua se 'emo o le mata lea, a o lona alofa tunoa o le ola lava lea; e afe ane le tagi i le afiafi, a o le alaga fiafia i le taeao.*” Salamo 30.

Ua aulia le vaitau o le Leni, o le tau o Talataloga, o Anapogi ma Mafauauga Loloto, i le ala na savalia e lo tatou Alii Faaola o Iesu. O le ala na fesaga'i ai o Ia ma le pouliuli o le lē mautonu e pei ona sa tatalo ai i Ketesemane, e ave'ese le ipu ua 'o'ona. A e sa sagatonu pea lana faiga filifiliga ma ana faai'uga fai, auā sa Ia faamuamua le finagalo o Lona Tamā, e fai mea faalogo i Lana faasinoga, ma faatuatua i ai. Mata o se ta'iala sili lea mo i tatou foi, a o i ai i le vaitau o fesaga'i ma le pouliuli o le lē mautonu ona o faama'i mata'utia, ua afaina ai le gasologa o feau a le atunu, le malo aemaise i le Ekalesia pele. La faamanua tele le Atua i lau faautaga ma lau faatofala'iga.

(Saunia e le Faatonu Sulu Samoa)

# O LE PEROFETA MULIMULI

(*O le tala faa-fagogo ua faa-Samoaina mai le tusi, ‘The Last Oracle’ tusia e James Rollins*).

Talu ai ona e tusa o le ‘afa o le mamafa o le ma’ a sa leai se mea e lagolago ai, o le ala lea na ta’ atia faasipa atu ai i le itu na faaleagaina ona ‘apa’ apa – se’ ia oo ina pa’ ū mālie ifo ma ta’ atia ai faaū i luga. Sa nuti ai ma isi ‘apa’ apa i lona mamafa, a e le’ i afaina ai le ma’ a i lana taavalevaledemū.

Na toe amo a’ e e Koualasaki le samala.

O Elisapeta sa faatau pupula i le tamaloa, i ona foliga filogia i le mata’ u ma le gatete.

Na faatopetope atu Karai i le pailate ma faatū vaetasi ai i ona tala ane. O le mea sa natia i lalo o le omofalosi ua aliali manino a’ e nei. E lē o se ma’ tāua ua polesi. Na tuu atu i ai e Karai le masini Gama-Sikauti. Na vevela ma maualuga le faitauga, a e lē sili atu le leaga nai lo le mea-vāai na latou maua muamua.

Na faamalieina Karai, ona toe tuu lea o le mea a e tu i luga.

O mata o Koualasaki sa faapaū ma tuufesili. “O se ulupoo? O le mea atoa lenei na fai, ona o se ulupoo?” Sa toe su’ esu’ e atili e Karai. O le ulupoo e ititi ma sa misia lona auvae i lalo. Na ia feliuliua’ i i lona itu. O nifo na totoe ai na faailoa mai ai ni nifo ‘a’ ati i se muāgutu toto’ a. “E lē se tagata,” o lana tala lea. “E tusa ai ma le lapo’ a ma le fuatino o autafa o le ulupoo, ou te matea o se manukī. Mautino o se simupanasē.” Sa atili ai ona oona foliga o Koualasaki. “Mata’ utia,” na ia faatosotoso loloa atu ai. “O nisi foi manukī.”

Na iloa e Karai o le tamaloa ua faatupula’ ia lona inoino i soo se mea tau manukī, o aafiaga o lana misiona talu ai. Ona o se mea fesoota’ i ma manukī, o kolila, po o papuni. E lē maua e Karai se tala sa’ o mai le tamaloa.

“A e o le ā... o le ā lena mea e pipii i autafa o le ulupoo?” na faasino atu ai e Elisapeta.

Na iloa lelei e Karai le uiga o lana fesili. E faigatā ona misia i le vaai a se tagata. O loo faapipii i le ponaiivi mafolafola manifinifi, i luga atu o le pu o le taliga, o taatia ai se poloka u’amea e pi’ o.

“Ou te lē mautinoa,” na ia tali ane ai. “Atonu o se mea faalogo. Po o se tasi o ituaiga fou o totoga faapipii.” “Mo se manukī?” na fesili ai Koualasaki. Na faamimigi Karai. “O le a su’ esu’ e lelei i se taimi o muamua.”

“Aiseā na aumai ai e lo’ u tamā lenei mea iinei?”

Sa lūlū le ulu o Karai. “Ou te lē iloa. A e i ai se tagata na mana’ o e taofi o ia. Ma o loo mana’ o pea e toe maua atu le mea lea.”

“O le ā la tatou mea o le a fai?”

“E saili so tatou auala atu i fafo. A e le’ i iloa e nisi ua tatou maua le mea lenei.”

Na tuu e Karai sina minute e saili atili ai le pailate, ina ne’ i i ai se isi mea na tuua e le polofesa i inei. E pei o se tusi e faamatala mai ai mea uma. E lē iloa lava e se tasi. Na ia ki atu lana mōlīuila i totonu o le avanoa i le omofalosi.

E leai se mea.

A o suigi ese mai lana mōlī, na suluia le pito i luga o totonu o le avanoa. Na taia ai lana vaai i se mea na iloa atu. E foliga mai o se pu faataali’ o na vaneina i lona laualuga, amata atu i ona laugutu ma vilivili atu se’ ia oo i le pu. Na tuu atu i ai lona tamatama’ ilima, ma iloa ai o se laina umi o gagana taufetu’ u. Na ia punou atu ma faasino tonu le mōlī i tusitusiga.

Na iloa atu e Elisapeta lona naunau. “O le Sanasekariti Anamua.”

Na tu ane i luga Karai. “O le a le mea a Sanasekariti e fai i totonu o le – ?”

Na faasalāvei atu Koualasaki. “A o le ā sona tāua i lenei taimi?” Na ia tusi faasino atu i le faitotoa. “Ia manatua le lapata’ iga i le pomu taufaamata’ u. E lē ua tatau ona tatou o ese vave mai le mea nei?”

Na matuā tu sa’ o nei Karai. E moni le tamaloa. Ua tele lo latou taimi ua māumāu. E lē taumate le faamamāina o le nofoaga ua –

Na faate’ ia i le i’uleo sa valaau mai le auala.

Na faasesepa mata o Koualasaki e manino o faapea mai, na ou fai atu foi?

“O le a le tatou mea a fai nei?” na fesili ai Elisapeta.

7.37 i le afiafi.

Na tu’itu’ i atu Penita i le faitoto’ a o loo matala o le ofisa o le foma’ i e su’ esu’ eina faama’ i.

“Afio mai i totonu,” na valaau atu ai Malakoma. “Sione, o ia te oe faamaumauga mai – ?”

Na tatala faavātele atu e Penita le faitoto’ a, fetoui ma le faalue mai e Malakoma o lona nofoa. O loo la’ eia pea e le foma’ i le seti solo afu lanu moana. O lana matatioata sa i luga o lona ulu. Na īloōlo le pou o lona isu a o ia iloa atu le tagata o tu mai i le faitotoa.

Na pupula lautele ona mata. “Lau susuga i le Faatonu...” Na ia tau tu a’ e i luga, a e tālo atu Penita e nofo pea i lalo a o ia ulufale atu i totonu.

“Na lapata’ i mai Parani sa e valaau mai. Faato’ ā ou sau nei i lo’ u ofisa mai le su’ esu’ ega o ata na pu’ e.”

---

“O maua ni ata o le tagata fanafana?”

“E oo mai nei e leai. O loo tau saili lava i faamaumauga. A e o faaputuga ata pei se mauga. O nisi kopi e tuai lava ona tali mai.”

Talu mai le faalavelave i le aso 11 o Setema, sa faamalosia ai le mata’itūina o le laumua. Mo le sefulu maila faataamilo i itu uma o le Fale Pa’epa’e, sa leoleoina ai e mea pu’e ata salalau, o inisi ma futu taitasi o auala, magāala, nofoaga faasao ma nofoaga mo tafaoga a tagata lautele. E faapea foi ma le silia ma le 60 pasene o nofoaga i totonus o potu ma ofisa. E tele mea pu’eata na latou maua ni nai vaega o le auala na uia e Foma’i Atipale Poleki i totonus o le Molo. Na latou faamaonia faamaumauga a Karai na maua i lana masini saili faaleitiō. Peitai sa i ai pea lava ni nai lapse. E ui ina sa maua ata o Poleki i le taimi na ia pa’ū atu ai i lima o Karai, a e leai ma se mea pu’eata na maua sina ‘emo o le fana po o le tagata na ia fanaina.

O se mea faapopoleina.

Na amata ona masalosalo Penita, sa iloa e le fasioti tagata le mea sa i ai masini pu’eata, ma na maua ai se vaiālia e lafi ai. A e sili ai ona mata’utia i lona masaloga, sa i ai se tagata na ia tagofia ma sui faamaumauga o ata, ina ia mautinoa e soloiesea ata ma foliga o le fasioti tagata.

Po o le a lava le tulaga, o nei faalētonu e ta’u mai ai o le fasioti tagata e i ai ona sootaga vāvālalata ma le malolosi i inei i Uosigitone. A o ai, a o fea foi? Pe afai o le tala faasolopito o Poleki i lona avea ma Iasoni e i ai sona fesootaiga ma lona fasiotiga, o lona uiga ua ia tatala le pusa a Panetora i soo se avanoa. O le au Iasoni sa pa’i o latou tamatama’ilima i mataupu ma poloketi aupito sili ona mauluga le lililo mai le ‘efu’efu se’ia oo i le uliuli pato’i.

Na iloa e Penita o le a lē maua sana moe i le po nanei.

E leai se tasi o i latou o le a maua se moe.

“Ua maua mai se tala ia Karai?” O le fesili atu lea a Malakoma, a o ia aveese faila mai le nofoa, sa faaavanoa atu mo Penita.

“O loo ia su’esu’eina le fale mataaga o tala faasolopito faanatura. Na tau atu i ai le ala na uia e Poleki.”

“Talosia na te maua ai se mea, a e o le ala foi lena na ou tuuina atu ai se valaau ia te oe. Atonu ua feoloolo lava ni nai a’u motuga ‘afa e mulimuli ai.’”

Na goto ifo Penita i lona nofoa i lona naunau e fia iloa. Na faataamilo e Malakoma lana laau komepiuta mafolafola ina ia iloa lelei atu ai e Penita.

“O le a se mea na e mauaina?” o le fesili lea a Penita.

“O se mea uiga ese. Ou te lē o manino lelei po o le ā, a e mafai ona ia faasino mai se nofoaga e fa’aaauai ai le su’esu’ega. O lo’u iloaina o le tamaloa sa puapuagatia i le faa-’ōnā i ‘ave oona o le ‘ea faavevela, na ou sailia ai ni faailoga mai le faapogai. O ulua’i su’esu’ega o Poleki i ona totoga e i ai ona āla’ai ma lona ate, e iloa ai na te le’i taumafaina se mea’ai sa aafia i se ‘ea ‘o’ona faavevela.”

“O lona uiga e le’i fa’ā-’ōnā i le tausiga o le po i se polonium-210 po o se mea faapena?”

Sa luelue le ulu o Malakoma. “Mai le mauluga o tikerī vevela o mū i lona pa’u, sa ou mautinoa ai o aafiaga mai le ‘ea oona faavevela, na maua mai le tulaga o si’osi’omaga. Atonu sa i ai o ia i se ituaiga o sone vevela. O su’esu’ega o lona lauulu na iloa ai le mauluga o le fa’aaliali matala atu i fafo o lona tino. E le’i atoa se vайасо talu ona fa’ā-’ōnā o ia.”

“A e po o fea – ?”

Na sii a’i luga e Malakoma le tasi ona lima e ta’u atu ia onosa’i mai, a o le isi ona lima na oomi ai lana komepiuta ma faailoa mai ai le faafanua o le lalolagi. “Sa i ai ni otaota o ‘ea oona sa panupanu i ‘alava o ona māmā. E pei o pefu o koale i māmā o se ‘eli koale. Sa ou su’esu’eina se vaega i le masini faapitoa ma sa mafai ona ou maua ai le vaevaega o le aofa’i o isotope sa i ai.

Na ia faasino atu i lana komepiuta. O le itu agavale sa faasolo a’e ai faamaumauga. “O nei ituaiga faamatalaga e masani ona tulaga ese le ma’ale’ale e pei o le lolomi o tamatama’i lima. Faato’ā uma ona lafo atu a’u faamatalaga i le ofisa o LFMA i Viena.” Na maitau atu e Penita i le avanoa e tusia ai mea e fia saili, o lomia ai le igoa o le faalapotopotoga: LĀLĀ FAAVĀOMALO O MALOSI ATOMIKA.

“E mata’itū e le lālā lenei nofoaga vevela i le lalolagi: o maina, atina’e, fale gaosi, ma isi. E ui i manatu o nisi tagata, a e lē tutusa uma ‘ea ‘o’ona faavevela. O loo ta’ua talanoa i le ituaiga e lē aunoa lona pala i taimi uma, e fesuisuia’i ona isotope, e fuafua i le nofoaga sa maina ai, ma pe sa faapefea foi lona gaosiga. O le i’uga e maua mai, o faailoga o ‘ea oona vevela e tulaga patino lava i nofoaga taitasi.”

“E faapefea la otaota na maua i māmā o le polofesa?”

“Na ou faia se sailiiliga mai le LFMA ma maua tonu mai ai.”

“Ua e iloa le nofoaga na aafia ai Poleki?”

Na luelue atu le ulu o Malakoma faasino i le komepiuta, ua uma le faasolosolo o faamatalaga, a

e o le faafanua o le lalolagi ua aliali faalautele, seia oo ina sumu faapitoa mai se nofoaga i le ogatotonu o Rusia. Na aliali mai se igoa i totonu o le pusa, o se igoa e masani ona fesoota' i vāvālalata ma faalavelave tau 'ea 'o'ona vevela.

#### KERENOPILE.

O le ā le mea a Atipale Poleki na fai i Kerenopile? E faapefea ona faailoa atu o ia i le laasaga mata'utia o 'ea oona vevela mai le nofoaga ua mate e faagaioi ai malosiaga o ea oona? O le nofoaga lea o loo fuafua i lenei vaiaso e faamaufaailogaina i se Sakofakusi fou, o se fale u'amea faapitoa tele. I totonu o le mau fausaga fou, a e maua pea Poleki i aafiaga o se malosi mata'utia o ea oona iinā?

A e le'i fesiliglia e Penita ia Malakoma mo nisi malamalamaga loloto, a e tatagi loa lana telefoni sa i lona fusipa'u. Na tatala ma siaki po o ai o valaau mai. O lana fesoasoani. Na ia tatala le telefoni e tali ma ona mata ita.

"Parani, o le ā?"

"Lau afioga i le Faatonu, na ou maua le lapataiga mai le malo tele. Sa i ai le taufaafefe i le pomu na valaau mai e le fale mataaga o tala faasolopito faalenatura."

Sa oomi mau tamatama'i lima o Penita i lana telefoni.

#### 7.56 afiafi.

Na iloilo lelei e Elisapeta le alii o Karai Piese a o latou lata atu i le nofoaga e la'u ai uta o le fale mataaga. Na ia maitauina ua tauau ina mavae ese atu le mā'ilā o le manu'a i le tasi itu o ona foliga. Sa ufitia le tele o isi faailoga i le lanu o lona pa'u sa faalā. O le fasiga e pei sa tupu i le masina talu ai. Na avatu ai i faalava o lona tino se vaaiga pei o se kopa ua maanuminumi i le soona samala, ma aumai ai i fafo le lanu moana o ona mata. O mata lava foi nei sa maniti ai lona tino, ina ua ia vaaia ni tamaloloa pe to'a ono sa faamamāina le nofoaga e la'u ai uta, ma latou liliu toe foi ai i tua.

"E i ai se mea e lē o sa'o iinei."

Na iloa atu e Elisapeta se vaaiga o se avanoa i le fale teu oloa, i tua atu o le tau'au o Karai. Sa faamalamalamaina e le susulu o molī, na iloa ai o loo tumu i fata uumi o loo faaputu ai le sapalai ma oloa mamago mo le faamamāina o fale ma vaega eseese o le fale mataaga. Sa i ai se masini lifi o loo tu i tafatafa o puli ma faapaleni mo le aumaiga o nisi pusa tetele mo le fa'aaliga. I le itu taumatau sa matala mai ai le faitoto'a u'amea ta'ata'ai. Sa iloa atu ai a o

sulua i le fai ifo o le la, se faapotopotoga o tamaloloa la'ei uli mo solo tete'e, ua faatulaga ane i autafa o le auala i fafo. I lalo ifo o le faaleotele leo mo faailoilo o le tu'ua o le nofoaga, sa latou su'esu'eina ai i latou uma o faigaluega sa gasolo atu e ulufafo i le itu lena. O se tamaloa e va-apiapi ona tau'au sa laei i se suti lanu moana, sa ia vaaia mai lenei galuega i nai sitepu e lē mamao ese. E manino le maualuga atu o lona tulaga.

Na faamalosia e Karai lo latou toe foi i tua ma Elisapeta i lalo i le auala. Na ia si'i a'e i luga teisi lana 'ato tau'ave i lona tau'au. Sa tusia ai le loko a le fale mataaga ma tau'ave ai le ulupoo uiga ese sa natia e lona tamā i totonu o le potu teu oloa o le fale mataaga. O le mafaufau atu i lona tamā, sa toe taia ai lona fatafata i le tiga sa tauau ina liua i loimata. Na ia taofia i tua. O le a faatino le tiga o lona misia o lona tamā i se taimi paganoa mulimuli ane.

Na ia ta'ita'i i latou i se faitoto'a e le'i faailogaina, ona ia tatala lea o le loka eletise i lana pepa. O sitepu i le itu mamao atu o simā pisipisia ma se lagolago u'amea e pipi'i ai i se tasi itu. E ma'ama'ai le aga'i i lalo. A e latou te le'i ulufale atu, na toe toso i tua la latou vaai i mea e taula ai vaa, i le gugulu mai o se leo 'o'olo. O se ataata na tolotolo maulalo ane ma iloa atu i le auala o le faletele. E tolusefulu iata le mamao ese. O se ta'ifau Siamani. Sa faa'ofu i se toniga uliuli, ma o loo ta'ita'i e se tamaloa e le'i iloa lelei atu.

Na matua'i tū malō Elisapeta pei o le 'aisa.

Na iloa atu i latou e le ta'ifau fe'ai ma oso atu i luma ia i latou, a o taofī mamau e lona maea.

"Alu", sa faamalosi atu Karai ma na tulei atu Elisapeta i le faitoto'a ma mulimuli atu ai o ia, soso'o atu ai ma lana paga tino laulauā i o la'ua tua. Na lagona le veevela ma le tapunipuni, e lē oo mai iinei le 'ea mālūlū. O sina malamalamasa maua e mai le matāuila mo faalavelave faafuase'i sa saisai.

Na tapuni e Karai le faitoto'a toetoe a lē lagona le pa'ō o lona faamau. Na gogolo le logo mo faailoilo. Na tālo atu Karai i le isi to'alua ia faapupuna i lalo i fasitepu fufusi, ma faaoefiofi atu ma ia i le mea o i ai Elisapeta. "E te iloa le mea e tau i ai nei alavai?" Sa lūlū lona ulu. "Ou te lē mautinoa. Ou te le'i alu sili atu nai lo le mamao sa mana'omia. O se lavelave o magāala eseese o loo i lalo atu, e faasino i soo se itu. O tala salalau faapea e oo atu nisi o nei auala i lalo o le Fale Pa'epa'e. A e tatau lava ona i ai se magāala e tau atu i le auala tele."

(E fa'aauau atu i le Sulu Samoa Aperila 2022)

## **NA O AFIOGA E TULEI MAI FOFOGA O LE ALII**

### **O TAGATA E IAI TUANA'I**

“<sup>11</sup>Sa i ai le fafine ua ia te ia le agaga e vaivai ai i ona tausaga ua sefulu ma le valu, ua faano’uno’u lava ia, e lē mafai lava ona tu sa’o i luga. <sup>12</sup>Ua silafia o ia e Iesu, ona valaau atu lea o Ia ia te ia, ua faapea atu, “Funa e, ua tatalaina lou vaivai.” <sup>13</sup>Ua faae’e atu e Ia ona aao ia te ia; ona faasa’oloaina lea o ia, ua vivii atu foi o ia i le Atua.”Luka 13.

E 18 tausaga sa nofo pagātia ai Isarelu, sa saisaitia ai e Ekelona le tupu o Moapi faapea Filisitia, ina ua nofoia Kanana (*Faamasino 3:14, 10:8*). Mata e i ai se uiga faa-faatusa o le numera 18 ma le ola saisaitia. Ua faapea foi le umi na saisaitia ai lenei tina e le agaga e vaivai aj; ua avea lea umi ma ala ua peisea’i ua talia i le mafaufau, ua siliga tali i seu se toe foi i se lelei, o lona i’uga lava lea e oo i le oti. Ua ‘ola faatasi ma le ma’i’, e pei ona i ai nei le tele o atunu, ua ola faatasi ma le koviti<sup>19</sup>. O le itu e lelei ai, e ui ina sa lē atoa lona malosi, a e sa taumafai lava ia alu i le malumalu e tapua’i i le Atua. O le Sapati lea, na **valaau** atu ai Iesu ia te ia, i le mea sa nofo ai, ina ia alu atu i luma, ma faamālōlō ai. Ma o le laasaga muamua lea i lona faamaloloina, o lona faalogo ma usita’i, o lona tu lava o ia i luga ma savali ia Iesu, ina ua valaau mai o Ia. Aiseā na le’i faamālōlō ai e Iesu, a o nofo mai o ia i lona nofoa?

(1) *E finagalo le Atua ina ia tatou faagāioi le faatuatua ma gāioi e tusa ma Lana Upu.* Pe afai e te ola ma tau’ave se faafitauli ua lē mafai ona ‘ave‘ese mo se taimi umi, o le a amata ona e manatu ifo, ‘E lē toe i ai se suiga.’ O le ala lea, a e le’i suia e le Atua ou tulaga o i ai, na te muamua suia lou mafaufau e mafai ai ona e vaaia nisi avanoa fou e gafataulimaina ai. O le uiga lea o le ‘faatuatua’. O la le Tusi Paia, “<sup>6</sup>A leai foi se faatuatua e lē mafai ona fiafia mai o ia; auā e tatau i lē alu atu i le Atua ona talitonu o loo soifua o ia, o ia foi na te tauia mai o ē matuā saili ia te ia.” Epe.11. E fia silasila mai o Ia o tatou faia le laasaga muamua, o le gāioi, faagaioi pe minoi atu ia te Ia.

(2) *E finagalo le Atua ina ia tatou teu malu faafaigaluega (invest) i lo tatou lava faa-saolotoga.* Pe afai e teu malu au saofaga poo ni mea totino i se nofoaga e faafaigaluega ai, e te faatāuaina ma puipui ina ia saogalemu. O le auala lena, pe afai e taumafai Satani e toe aumai le faafitauli, e te fai atu i ai, ‘E leai, ou te lē taliaina lena. E lē o a’u lena, ua leva ona oti lo’u tagata lena. O a’u o le foafoaga fou ia Keriso.’ Tatou te lē iloa pe fia le umi o le taimi na alu, a o taumafai lenei tina e savali ma ia oo atu i luma o le faapotopotoga ina ua valaau Iesu ia te ia. O tagata o feagai ma mafatiaga, puapuagā ma vaivaiga, e lē gafatia le gaioi vave e pei o tagata malolosi. Ma e i ai nisi a’oa’oga taua mo i tatou mai le tala a lenei tina:

(3) *E i ai nisi taimi o le a e lē tupu ma matua vave e pei o isi tagata, auā sa e tauivi ma se faafitauli faatupu vaivai mo se taimi umi.* O mea e foliga faigofie i isi tagata faatuatua, e avea ma mea e sili ona faigata ia te oe. A e o le tala fiafia: e faatali mai pea Iesu mo oe ma a’u a o tatou taumafai atu; e fesoasoani ma faatasi mai o Ia ia i tatou seia oo ina fo’ia o tatou faafitauli.

(4) *E fai ma molimau le tofotofoga na e manumalo ai.* O le a lava le gaogaosā sa e ui mai ai, o le aso nei o loo valaau ai Iesu ia te oe, ‘Ina tula’i ia i luga! E mafai ona e oo mai ia te a’u.’ O a ni mea leaga sa e faia i isi, o a foi sauaga sa faia e isi ia te oe, o loo valaau mai pea o Ia. Ina ne’i e faapea ane e sili ona matagā ma ogaoga au mea lilo nai lo isi. Ia e mautinoa ua silafia manino e le Atua. Ma o Lana folafolaga ia te oe: “<sup>3</sup>O le alofa e faavavau, ua ou alofa atu ai ia te oe; o le mea lea ua ou faafualoaina ai lo’u alofa ia te oe. <sup>4</sup>...ou te toe ati a’e ia te oe, ona atiina a’e ai lea o oe...e te alu atu foi e siva faatasi ma e sisiva.” Iere.31. E pei o le tufuga vane faatagata na te gaosia se faatagata matagofie mai se papa faatauvaa ma matagā, e faapena ona liliu e le Atua ou gaogaosā e avea ma feau faatupu faamoemoe mo nisi tagata. O le mafuaaga lena e osofa’i ai oe e Satani, ona o loo ia te oe se mea tāua, e tautele ma taugatā lona aogā. E taualuga le tala i le fafine i upu nei: “<sup>17</sup>Ua olioli lava le motu o tagata uma ona o ia mea silisili uma na faia e ia.” O le fuafuaga a le Atua, ia mafai e tagata ona latou vaai atu i lou olaga ma latou fai ane, ‘Ua i ai le mea ua tupu ia te oe; ua e lē toe tutusa e pei ona sa masani ai, ua lē toe tagata tuai, a ua fou!’

# **O E UA FAI I LAGI FOLAUGA**

## **AVEA VAGANĀ TALITONU (FAIFEAU SAMOA PENISIONE)**

*Aso na soifua ai: Aso Lua, 29 Aperila 1947*  
*Na valaaau lona Matai: Aso Lua, 1 Mati 2022*  
*(74 tausaga + 10 masina + 2 aso)*

*“E silisili i le manatu o le Alii le oti o ona tagata amio Atua.” Salamo 116:15.*

Ou te faia lenei faamatalaga ma le agaga fa’aloalo mo le mamalu o le au faitau.

O le susuga ia Avea Vagana Talitonu FS ma le faletua ia Saumaleula Talitonu, o se Matafale o lenei Aulotu, le EFKS Ululoloa ma Siusega. Na ulua’i galulue i la’ua i le tofi A’oa’o Fesoasoani mai le tausaga 1986-1999. O le tausaga lava lena e 1999 na faamanuiaina ai i le Su’ega Ulufale a le Kolisi Faafafeau Malua, ina ua 55 tausaga o le soifua, ma aga’i atu loa e a’otauina. Na faai’uina le taumafai i le tausaga 2003, ma valaauna ai i le Galuega Faafafeau Tausinuu i le EFKS Sale’imoa ma galulue ai, se’ia malolo manumalo mai ai ua a’e o la faiva mo Keriso, i le tausaga 2015. E le’i faigofie lea taimi auā e tau mai i fanua, ua telē se aafiaga o le soifua maloloina o le tamā ona o se gasegase tumau. Ma o iina na fai ma faatupu gasegase ia te ia talu ona mālōlō mai.

*O le Aso Tofi 3 Oketopa 2019, na tuua ai Samoa mo Niu Sila auā sailiga togafitiga; a e paga lea ua afe moe le faigamalaga ua fuli mai lona tua i le Faletua, o le nofoaalo ma aiga; aemaise o lana aulotu na talosiaina lona gasegase. O le Aso Lua 1 Mati 2022, na maliu ai o ia i le Maota Gasegase i St. Christopher Care, Aukilani Niu Sila. Sa faia lona Falelauasiga i le Aso Sa 6 Mati 2022, i Tipene Funarals, Onehunga, Aukilani Niu Sila. Sa ta’ita’ia e le susuga Tone Leituala FS ma le Aulotu i Mangere Bridge, ona faai’u ai lea i le Faaliuefuefuina (cremation) o lona tino maliu. O se faai’uga lea na tasi i ai le finagalo o le Faletua Penisione ma o la’ua alo, talu ai tulaga faigata o femalaga’iga i le taimi ma’ale’ale o le Koviti-19.*

Na mae’ a le taimi faanofoesea o le faletua ia Saumaleula ma se tasi o le fanau, ona molimoli atu ai lea o lona URN i lona nofoaga mau i Vaitele-uta,

Fanaio Street, ma faatino ai le *Sauniga Lotu Faafetai*, i le Aso Toonai 9 Aperila 2022 i le 10.00 i le taeao. Na ou ta’ita’ia lenei sauniga, o le faitauina o le Tusi Paia na saunoa i ai *Taupa’ū Mika Leo* (AF), ma talosaga sa saunia lea e *Ainu’ū Lisale* (AF). O upu faatauina e tusa ma le faasinoga a le Tusi Faitau Aso, *TŪ MATI’E* (*Standing Tall*) na ‘au’au i ai se mafaufauga faaleagaga. Fetalai ai Iesu, “*A afua ona faia o ia mea, ia tepa a’e outou ma ia ea i luga o outou ulu, auā e latalata ona faaolaina outou.*” *Luka 21:28.* O le soifua auauna lea o le susuga i le Faifeau Penisione, auā o se tamā e tū maualuga lana tautua sailimalo i aiga, o nuu, ma le malo e oo lava i le Galuega Paia a le Atua. Ua fai lea ma lu’itau aogā mo nai o la’ua alo ma le mamalu o aiga na lua o loo soifua pea. O se mavaega lea ua tino i le soifua galue, e pei ona taumavae Tavita i lona atalii o Solomona i upu nei: “*O le a ou alu i le ala o le lalolagi uma; ia e faamalosi, ma ia e faatamatane; ia e tausia foi sauniga a le Alii lou Atua...ia savali i ona ala...tausi i ana sauniga...poloaiga...faamasinoga, ma ana tulafono.*”

Sa molimauina e se vaega to’aititi o le Ekalesia, ona o le numera tapula’ a e pei ona i ai Poloaiga Faalemalu o le Koviti-19. Na auai foi aiga na lua, o taulaga soifua a aiga, o uo ma aumea mamae a le susuga Avea Vagana Talitonu.

Talofa ua mafuli le laau paolo na mapu i ai Saumaleula ma le fanau i lona malu. Na faalepa i ai le fua, pe a filimafua le tofa a aiga na lua. O le fuesina o le Tala Lelei na saili i ai le tofa ma le filemu o le Ekalesia e ala i galuega faufautua. O lea ua susū atu Avea i le nuu e galoo ai mea. Alu ia Lau Susuga i le Faifeau Penisione, alu ia i le Nuu pa’ia; auā ua valaaau mai lo tatou Matai Sili i le Lagi; “*Le auauna lelei e, ma le faamaoni, ulufale mai ia i le fiafia o lou Alii...*” La manuia lau malaga!

*Saunia: Susuga Kirisimasi Sani FS,  
EFKS Ululoloa ma Si’usega,  
Matagaluega FALEATA.*

## **FA'APUSI MALIELEGAOI POGI FATU**

**16/3/1925 - 12/10/2021 (96+6+27)**

O le tina matua ia Fa'apusi Malielegaoi Pogi, na soifua mai i lona nu'u o Lepa, Aleipata i le Aso Gafua, 16 Mati 1925. Na fa'aipoipoina ma fa'atii'akonoina e le Susuga i le faife'au o Ieti Taule'alo i ia ona po. O se tina sa galue fa'a-aigalua i ona Matāfale e 2 e lē gata o le EFKS i Lepa, a o le Matāfale i le EFKS i Tanoaolei'a, i Vaivase-uta.

O le tausaga e 2004, na malaga mai ai Fa'apusi i Niu Sila nei e mafuta ma nisi o le fanau ua leva ona nofomau i Niu Sila. Ma o ia o se tagatanu'u o le Malo o Niu Sila, ma na taunu'u mai loa galue loa i lana Matāfale fesoasoani i le EFKS Western Springs a o ma galulue ai. E alu 'ese mai le tina matua mai Samoa, a o lo'o fa'apea lava ona fa'aauau Matāfale e 2 i Samoa i le EFKS Tanoaolei'a ma le EFKS i Lepa, e pei ona galulue ai pea si ana fanau. Ma sa molimauina ai e le Susuga i le Toea'ina ia Enefatu Lesa FT.

I le mafutaga ma Fa'apusi, o se tina e fa'amaoni lona alofa i le galuega a le Atua. Sa ou maitauina o se tina e fiafia e fai taulaga mo le EFKS i ana Faiga Taulaga e 2 i le tausaga. O le naunauta'iga lea o Fa'apusi, ina ia mautinoa ua fa'ata'atia lana Taulaga a o le'i o'o i le masina o le Faigataulaga. O Fa'apusi e fa'amaoni lona alofa i lana Faifeau, auā o se tina e lē misi le vайaso ma ana meaalofa e foa'i i le Faife'au ma lona 'aiga.

O se tina sa tele sona sao ma lana lagolago i Vaega uma o le Ekalesia, e pei o le Mafutaga a Tina, Autalavou, A'oga Aso Sa, Junior Youth, Aufaipese ae maise lana Mafutaga o le Sau o le Ola, o le mafutaga a nai matua matutua. O se tina e lē aivaleina (tulou) se mea tausami na te maua, a e tatau lava ona momoli se taumafataga a le Faife'au.

E tu'ua le malo e le tina lauao sinasina ia Fa'apusi, ua atoa le 96 tausaga, 6 masina ma aso e 27 o lona soifua tulutulu'i. Ma o se tina e pele ma mamaē le mafutaga ma si ana fanau i soo se tafa o le lalolagi. Auā o tausaga uma talu mai le fa'amanatuina o lona 89 tausaga i le 2014, e lē mafai ona misi e nai ona alo uma o lo'o alaala i atunu'u mamao ma Samoa, isi ona aso soifua mulimuli ane.

O le Aso Lua, 12 Oketopa 2021, i le itula e 5.30 i le afiafi, na vala'au ai lona Matai mo ia, i lona maota i Glen Eden. Sa logoina a'u ma ou ta'ita'iina ai nai

fanau ma 'aiga i so'o se tafa o le lalolagi ma Samoa i le Tatalo i luga o Upega Tafa'ilagi.

Na ou ta'ita'iina le Sauniga Fa'ale'aiga mai le Malumalu EFKS Western Springs i le 7 i le afiafi o le aso 14 Oketopa, 2021. Na saunia e le Susuga i le Toeaina Penisione o Lucky Slade le Upu fa'amafanafana. Sa faitauina e le Susuga i le Faife'au o Ali'imau To'iaivao le Tusi Pa'ia, a e o le Tatalo Fa'afetai na saunia e le Susuga ia Seiuli Toelupe (AF), Susuga Taliaoa Sanerivi (AF) o le Fa'ato'esega, a e o le Susuga ia Ulimasao Otto Lealofi (AF) o Mana'oga.

Talu ai ona e tu'ua le malo e le tina matua i le taimi tonu o le Vaega 4 o Tulafono o le Koviti-19, o lea na fa'amavae atu ai i lona oliolisaga tumau i le Fanua Maliu i Waikumete i le Sauniga Mulimuli na ou ta'ita'iina, ma sa 'auai ma le Susuga i le Toea'ina o le Pulega, Susuga ia Fiatepa Fa'ae'e FT, ma nisi to'aititi o le fanau ma 'aiga, e tusa ma le numera fa'atapula'aina.

Ma na matou fa'amavae atu ai i le tina ia Fa'apusi, i le Pese fa'amavae a le Au Kerisiano "TALOFA USO E, TOFAINA OE."

**MANUIA LAU FAIGA MALAGA TINA FA'APUSI!**

*Alofa'aga ma saunia:*

*Vagatai Va'aelua (FS Penisione)*

*EFKS Western Springs*

*Matagaluega AUKILANI*

## **SALEUPOLU TIOPE TAUAMITI**

**3/11/1940 - 20/3/2022 (81 + 4 + 18)**

O Saleupolu Tiope Tauamiti o se alii tiakono ma se tamā matua o lenei Ekalesia i Vailele. O le Afioaga foi sa tofia e fai ma le Taitaifono o le Komiti a le EFKS Vailele. Sa ia galue foi i le tofi "Taitai Pese" a le matou ekalesia i tausaga e tele ua mavae. I le tausaga 2016 sa avea le Afioaga ia Saleupolu ma Sui usufono a le Matagaluega a Apia i Sasa'e i le Fono Tele i Malua. O le tamā matua ia Saleupolu Tiope Tauamiti na soifua mai i le Aso Sa 3 Novema 1940 a e na faamānava e le Atua ana feau i le soifuaga nei i le Aso Sa 20 Mati 2022 ina ua 81 tausaga, 4 masina ma aso e 18 lona soifua. O ona toe sauniga sa faia lava i Vailele, o le afioaga ma le ekalesia ua loa ona tautua ma galulue ai, i le aso 29 Mati 2022. To'atele

sa molimau i le tamā, ma na latou ta’ua o se tagata faamoemoeina ma faatuatuaina i lona tulai mai. O lea ua molimau foi sui o aiga, aemaise o fanau, sa auga ma faatāua e Saleupolu le soifua tautua ma ola auauna mo IESU ma Lana EKALESIA, o le tamā e alofa, e onosai ma loto maulalo, e savali i upu na te a’oa’o. E matagofie galuega na te fai. E tausa’afia, e onosai e alofa i lana fanau, ona uso ma tuafafine, ma a latou fanau, e agai i ai ma faamaopoopo. E loto fesoasoani i so’o se tagata. Sa fai e Saleupolu le faata’ita’iga, e LĒ faalogologotiga pe solomuli pe a tele le auaunaga mana’omia. Na te lē faatigā i se finagalo o se isi tagata, ae taulamua i le faatupu o le filemu ma le nofolelei. O Saleupolu e tausi faifeau . E fai taulaga ma taulamua i faata’ita’iga lelei. O se tiakono sa faamoemoeina foi i le ekalesia i le tele o ana galuega sa fai. Sa fiafia lava foi matou te o i le Fono Tele i Malua, ma na silafia e Susuga i Toeaina lana galue, ona ia tofia ai lea o Saleupolu Tiope e fai ma Komiti Tumau o le fale o le Pulega. Amuia lava lea auauana auā e valaaau mai le Matai a e o loo faapea ona ia fai. Sa auau lava foi manatu o lona toe sauniga i upu a le Poto e faapea “*o le tauleleia e sili i le suauu manogi ma le aso e oti ai e sili i le aso e fanau mai ai.*” Amuia oe Saleupolu ua e oti i le oti a le Kerisiano faamaoni ma ua e foi i lou Matai. Ia manuia lau malaga. Alofaaga mai ia te au nei faapea la tatou Aulotu i lau susuga i le alii Tiakono.

O le itula e 10.00 i le taeao, Aso 29 Mati 2022 sa fai ai ona toe sauniga i Vailele. Sa ou ta’ita’iina le sauniga ma sa ou molimau i le soifua galue o Saleupolu. Sa saunia e Paulo Sepuloni (AM) ia talosaga ae faitau Tusi Paia Lealilee Asamu Ah Sam (AF). O ona toe sauniga sa faataunuina lava lea i lona oliolisaga tumau i lona fanua i Vailele, ma sa ou ta’ita’iina foi lea vaega. Faafetai Saleupolu . O lou aao mafola, o lou agalelei i lagona ma manatu aemaise o fautuaga ma lapataiga. Ia saga faatumauina pea le viiga i le ATUA o LĒ sa foai mai le tagata e fai ma ona foliga vaaia i totonu o mafutaga. O lau Tofa ma le Faautaga faa Toeaina sa tausi ai aiga, nuu ma le Ekalesia. “*Le auauna lelei e, ma le faamaoni, ua e faamaoni i nai mea itiiti, ou te tofia oe e pule i mea e tele; ina ulufale mai ia i le fiafia o lou Alii*” Malaga ia i le Lagi lau Tofa Saleupolu Tiope Saleupolu. Faafetai mo lau Tootoo Lauga.

Faafetai mo lau Tautua Matavela.  
*Saunia: Siaosi Salesulu (FS)*  
*EFKS Vailele.*  
*Matagaluega VAIMAUGA*

## **TALAAGA SOIFUA LUPELINE F. TAGALOA**

**(87 tausaga + 6 masina + 27 aso)**

1934 - Aso Tofi 26 Aperila, lona aso fanau.

1956 - Faaipoipo ia Feata Tagaloa FT

1957 - Na la’ua i’u mai ai i le Kolisi Faafafeau Malua

1958 - Fepuari, faau’u tofi Faifeau Samoa (FS) mo le Galuega Faamisionare i Papua, Niu Kini.

1958-Aperila, tuua Samoa mo Papua Niu Kini.

1964 - Me, toe taliu mai i Samoa mae’ a le 6 tausaga.

1966 - Iuni, osi feagaiga EFKS Siufaga Falelatai, Matagaluega AANA.

1980 - Ianuari, osi feagaiga EFKS Vaipuna, APIA.

1992 - Tofia avea ma Faifeau Toeaina o le Pulega Apia Sasa’e.

1998 - Me, Fono Tele Malua, Malolo Penisione.

2009 - Maliu le Susuga Toeaina Feata Tagaloa FT.

## **2021- Novema 21 (Aso Sa) maliu ai Lupeline.**

O lona Toe Sauniga, na faia i le malumalu EFKS Maugafafia, i le aso 30 Novema 2021.

Ta’ita’i o le Sauniga - Susuga Ionatana Te’o FS.

Faaulufale le Sa o le Tina-Susuga Irenio Tagaloa FS

Talosaga - Susuga Tuioti Oloapu, A’oa’o Fesoasoani

Faitau Tusi Paia, Molimau ma Lauga - Ta’ita’i o le Sauniga, susuga Ionatana Te’o FS.

Molimau - Susuga Irenio F. Tagaloa FS, Fata Tanielu Tagaloa, sui o Aiga ma sui Mafutaga Tina.

Sauniga i le Oliolisaga Tumau - Ionatana Te’o FS.


O loo lagomau i lona aiga i Maugafafia, Vailele.

Ua malie toa, ua malo tau! Ua tautai a’e!


*(Tala tuuina mai susuga Irenio F. Tagaloa FS, o le Taulaga Soifua a le Tina Penisione mo le Atua)*

## O E UA FAI I LAGI FOLAUGA

**LUPELINE F. TAGALOA**  
**(TINA PENISIOME)**



**AVEA VAGANĀ TALITONU**  
**(FAIFEAU PENISIOME)**



**FA'APUSI MALIELEGAOI  
POGI FATU**



**SALEUPOLU TIOPE TAUAMITI**

